

摘藻堂四庫全書薈要

史部

欽定四庫全書薈要卷六千一百八十

遼史卷五十五

元中書右丞相總裁托克托等修

志第二十四

儀衛志一

遼太祖奮自朔方太宗繼志述事以成其業於是舉渤海立敬塘破重貴盡致周秦兩漢隋唐文物之遺餘而居有之路車法物以隆等威金符玉璽以布號令是以

傳至九主二百餘年豈獨以兵革之利士馬之強哉文  
謂之儀武謂之衛足以成一代之規模矣考遼所有輿  
服符璽儀仗作儀衛志

輿服

自皇帝而降輿服之制其來遠矣禹乘四載作小車商  
人得桑根之瑞為大輅周人加金玉象飾益備秦取六  
國儀物而分別其用先王之制置而弗御至漢中葉銳  
意稽古然禮文之事名存實亡蓋得十一於千百焉唐

之車輅因周隋遺法損益可知而祭服皆青朝服皆絳  
常服用字文制以紫緋綠碧分品秩五代頗以常服代  
朝服遼國自太宗入晉之後皇帝與南班漢官用漢服  
太后與北班契丹臣僚用國服其漢服即五代晉之遺制  
也考之載籍之可徵者著輿服篇冠諸儀衛之首

### 國輿

契丹故俗便于鞍馬隨水草遷徙則有氍毹車作載有大  
車婦人乘馬亦有小車貴富者加之華飾禁制疎闊貴

適用而已帝后加隆勢固然也輯其可知著于篇

大輿柴冊再生儀載神主見之

輿臘儀見皇帝皇后升輿降輿

總纛車駕以御駝祭山儀見皇太后升總纛車

車納后儀見皇后就車

青幃車二螭頭蓋部皆飾以銀駕用駝公主下嫁以

賜之古者王姬下嫁車服不繫其夫下王后一等

此其遺意歟

送終車車樓純飾以錦螭頭以銀下縣鐸後垂大氈  
駕以牛上載羊一謂之祭羊以擬送終之用亦賜  
公主

椅冊皇太后儀皇帝乘椅自便殿舉至西便門

鞍馬祭山儀皇帝乘馬侍皇太后行獵儀皇帝降輿  
祭東畢乘馬入獵圍色克色哩儀俱乘馬東行羣  
臣在南命婦在北

漢輿

太宗皇帝會同元年晉使馮道劉煦等備車輅法物上  
皇帝皇太后尊號冊禮自此天子率服昉見於遼太平  
中行漢冊禮乘黃令陳車輅尚輦奉御陳輿輦盛唐輦  
輅盡在遼廷矣

五輅周官典輅有五輅秦亡之後漢創製

玉輅祀天祭地享宗廟朝賀納后用之青質玉飾黃  
屋左纛十二鑿在衡二鈴在軾龍輅左建旂十二  
旂皆畫升龍長曳地駕蒼龍金塗鏤錫鞶纓十二

就遼國勘箭儀皇帝乘玉輅至內門聖宗開泰十  
年上升玉輅自內三門入萬壽殿進七廟御容酒  
金輅饗射祀還飲至用之赤質金飾餘如玉輅色從  
其質駕赤騮

象輅行道用之黃質象飾餘如金輅駕黃騮

革輅巡狩或事用之白質革鞅駕白翰

木輅田獵用之黑質漆飾駕黑駱

車制小於輅小事乘之



耕耨車耕籍用之青質蓋三重餘如玉輅

安車一名進賢車臨幸用之金飾重輿曲壁八鑾在

衡紫油纁朱裏幪朱絲絡網駕赤騶朱輦纓

四望車一名明遠車拜陵臨弔則用之金飾青油纁

朱裏通幪駕牛餘同安車

涼車省方及罷獵並用之赤質金塗銀裝五彩龍鳳

織籐油壁緋條蓮座駕以橐駝

輦用人挽本宮中所乘唐高宗始制七輦周官巾車有

构欄絡帶皆繡雲鳳銀梯主輦八十人

大芳輦

仙游輦

小輦永壽節儀皇太后乘小輦

芳亭輦黑質幕屋緋欄皆繡雲鳳朱綠夾窓花板紅  
網兩簾四竿銀飾梯主輦百二十人

大玉輦

小玉輦

逍遙輦常用之椽屋赤質金塗銀裝紅條輦官十二人春夏緋衫秋冬素錦服

平頭輦常行用之制如逍遙無屋冊承天皇太后儀皇太后乘平頭輦

步輦聖宗統和三年駐蹕土河乘步輦聽政

羊車古輦車赤質兩壁龜文鳳翅緋幃絡帶門簾皆繡瑞羊畫輪駕以牛隋易果下馬童子十八人服繡瑞羊人挽之

輿以人肩之天子用鞮絡臂綰

腰輿前後長竿各二金銀螭頭緋繡鳳襪上施錦褥  
別設小床奉輿十六人

小輿赤質青頂曲柄緋繡絡帶制如鳳輦而小上有  
御座奉輿二十四人

皇太子車輅

金輅從祀享正冬大朝納妃用之冊皇太子儀乘黃  
令陳金輅皇太子升降金輅

輶車五日常朝享宮臣出入行道用之金飾紫幃朱  
裏駕一馬

四望車弔臨用金飾紫油纁通幃駕一馬

遼史卷五十五

遼史卷五十五考證

涼車省方罷獵用之 涼車下原文衍赤質二字今刪

鞞纓十二就 按經文作繁馬腹帶也若左氏傳鞞厲

游纓訓解與禮經異後人沿訛用之姑仍舊

遼史卷五十五考證

欽定四庫全書薈要卷六千一百八十一

遼史卷五十六

元中書右丞相總裁托克托等修

志第二十五

儀衛志二

國服

上古之人網罟禽獸食肉衣皮以儺鹿韋掩前後謂之  
鞞然後夏葛冬裘之製興焉周公陳王業七月之詩至



於一日于紹三月條桑八月載績公私之用由是出矣  
契丹轉居薦草之間去遼古之風猶未遠也太祖仲父  
蘇呼以貂尼氏裕悅之官占居潢河決壤始置城邑為  
樹藝桑麻組織之教有遼王業之隆其亦肇迹於此乎  
太祖帝北方太宗制中國紫銀之鼠羅綺之筐襦載而  
至纖麗與毳被土綢木於是定衣冠之制北班國制南  
班漢制各從其便焉詳國服以著厥始云

祭服遼國以祭山為大禮服飾尤盛

大祀皇帝服金文金冠白綾袍紅帶縣魚三山紅垂飾犀玉刀錯絡縫烏鞞

小祀皇帝硬帽紅絳絲龜文袍皇后戴紅帕服絡縫紅袍縣玉佩雙同心帕絡縫烏鞞

臣僚命婦服飾各從本部旗幟之色

朝服太祖丙寅歲即皇帝位朝服衷甲以備非常其後行色克色哩禮大射柳即此服統和元年冊承天皇太后給三品以上用漢法服三品以下用大射柳之服

皇帝服實魯衮冠絡縫紅袍垂飾犀玉帶錯絡縫鞞  
謂之國服衮冕太宗更以錦袍金帶

臣僚戴氎冠金花為飾或加珠玉翠毛額後垂金花  
織成夾帶中貯髮一總或紗冠制如烏紗帽無簷  
不據雙耳額前綴金花上結紫帶末綴珠服紫窄  
袍繫鞞鞞帶以黃紅色條裏革為之用金玉水晶  
靛石綴飾謂之盤紫太宗更以錦袍金帶會同元  
年羣臣高年有爵秩者皆賜之

公服謂之展裏著紫興宗重熙二十二年詔八房族巾幘道宗清寧元年詔非勲戚之後及額爾奇木副使并承應有職事人不帶巾

皇帝紫皂幅巾紫窄袍玉束帶或衣紅襖臣僚亦幅巾紫衣

常服

宰相中謝儀帝常服高麗使者入見儀臣僚便衣謂之盤裏綠花窄袍中單多紅綠色貴者披貂裘以

紫黑色為貴青次之又有銀鼠尤潔白賤者貂毛  
羊鼠沙狐裘

田獵服

皇帝幅巾擐甲戎裝以貂鼠或鵝項鴨頭為扞腰番  
漢諸司使以上竝戎裝衣皆左衽黑綠色

弔服太祖叛弟埒克等降素服受之

素服乘赭白馬

漢服

黃帝始制冕冠章服後王以祀以祭以享唐收殷皞周  
弁以朝冠端以居所以別尊卑辨儀物也厥後唐以冕  
冠青衣為祭服通天絳袍為朝服平巾幘袍襪為常服  
大同元年正月朔太宗皇帝入晉備法駕受文武百官  
賀于汴京崇元殿自是日以為常是年北歸唐晉文物  
遼則用之左右采訂撫其常用者存諸篇

祭服終遼之世郊丘不建大裘冕服不書

衮冕祭祀宗廟遣上將出征飲至踐阼加元服納后

若元日受朝則服之金飾垂白珠十二旒以組為  
纓色如其綬黹纁充耳玉簪道玄衣纁裳十二章  
八章在衣日月星龍華蟲火山宗彝四章在裳藻  
粉米黼黻衣標領為升龍織成文各為六等龍山  
以下每章一行行十二白紗中單黻領青標襪裾  
韍革帶大帶劍佩綬舄加金飾元日朝會儀皇帝  
服衮冕

朝服乾亨五年聖宗冊承天太后給三品以上法服雜

禮冊承天太后儀侍中就席解劍脫履重熙五年尊號冊禮皇帝服龍衮北南臣僚竝朝服蓋遼制會同中太后北面臣僚國服皇帝南面臣僚漢服乾亨以後大禮雖北面三品以上亦用漢服重熙以後大禮竝漢服矣常朝仍遵會同之制

皇帝通天冠諸祭還及冬至朔日受朝臨軒拜王公元會冬會服之冠加金博山附蟬十二首施珠翠黑介幘髮纓翠綬玉若犀簪導絳紗袍白紗中單



標領朱襪裾白裙襦絳蔽膝白假帶方心曲領其  
革帶佩劍綬鞬烏若未加元服則雙童髻空頂黑  
介幘雙玉導加寶飾元日上壽儀皇帝服通天冠  
絳紗袍

皇太子遠遊冠謁廟還宮元日冬至朔日入朝服之  
三梁冠加金附蟬九首施珠翠黑介幘髮纓翠綬  
犀簪導絳紗袍白紗中單皂領標襪裾白裙襦白  
假帶方心曲領絳紗蔽膝其革帶劍佩綬鞬烏與

上同後改用白韞黑烏未冠則雙童髻空頂黑介  
幘雙玉導加寶飾冊皇太子儀皇太子冠遠遊服  
絳紗袍

親王遠遊冠陪祭朝饗拜表大事服之冠三梁加金  
附蟬黑介幘綬簪導絳紗單衣白紗中單皂領襪  
裾白裙襦草帶鈎膝假帶曲領方心絳紗蔽膝  
韞烏劍佩綬二品以上同

諸主遠遊冠三梁黑介幘青綬

三品以上進賢冠三梁寶飾

五品以上進賢冠二梁金飾

九品以上進賢冠一梁無飾

七品以上去劍佩綬

八品以下同公服

公服勘箭儀閣使公服繫履遠國常用公服矣

皇帝翼善冠朔視朝用之拓黃袍九環帶白練裙襦

六合鞞

皇太子遠遊冠五日常朝元日冬至受朝服絳紗單衣白裙襦革帶金鈎鶮假帶方心紛鞞囊白鞮烏皮履

一品以下五品以下冠幘纓簪導謁見東宮及餘公事服之絳紗單衣白裙襦帶鈎鶮假帶方心鞮履紛鞞囊

六品以下冠幘纓簪導去紛鞞囊餘竝同

常服遼國謂之穿執起居禮臣僚穿執言穿鞞執笏也

皇帝柘黃袍衫折上頭巾九環帶六合鞞起自宇文  
氏唐太宗貞觀已後非元日冬至受朝及大祭祀  
皆常服而已

皇太子進德冠九珎金飾絳紗單衣白裙襦白鞵烏  
皮履

五品以上幘頭亦曰折上巾紫袍牙笏金玉帶文官  
佩手巾算袋刀子礪石金魚袋武官鞬鞞七事佩  
刀刀子礪石契苾真職厥計筒火石袋烏皮六合

鞞

六品以下幘頭緋衣木笏銀帶魚袋佩鞞同  
八品九品幘頭綠袍鍮石帶鞞同

遼史卷五十六

遼史卷五十六考證

太祖叛弟埒克等

埒克舊作刺葛此又作刺哥今畫

一改



遼史卷五十六考證



總校官原候補知府臣葉佩蓀

校對官編修臣吳錫麒

謄錄監生臣孫樹新

欽定四庫全書薈要

史部  
遼史卷五十七至  
六十五

詳校官祭酒臣韋謙恒



欽定四庫全書薈要卷六千一百八十二

遼史卷五十七

元中書右丞相總裁托克托等修

第二十六

儀衛志三

符印

約尼氏之世受印于回鶻至伊蘭汗乃請印於唐武宗  
始賜奉國契丹印太祖神冊元年梁幽州刺史來歸詔



賜印綬是時太祖受位約尼十年矣會同九年太宗伐  
晉末帝表上傳國寶一金印三天子符瑞於是歸遼  
傳國寶秦始皇作用藍玉螭紐六面其正面文受命于  
天既壽永昌魚鳥篆子嬰以上漢高祖王莽篡漢平  
皇后投璽殿階螭角微玷獻帝失之孫堅得於井中  
傳至孫權以歸于魏魏文帝隸刻肩際曰大魏受漢  
傳國之寶唐更名受命寶晉亡歸遼自三國以來僭  
偽諸國往往模擬私製歷代府庫所藏不一莫辨真

偽聖宗開泰十年馳驛取石晉所上玉璽于京中興  
宗重熙七年以有傳國寶者為正統賦試進士天祚  
保大二年遺傳國璽于桑乾河

玉印太宗破晉北歸得于汴宮藏隨駕庫穆宗應歷二  
年詔用太宗舊寶

御前寶金鑄文曰御前之寶以應臣僚宣命  
詔書寶文曰書詔之寶凡書詔批荅用之

契丹寶受契丹冊儀符寶郎捧寶置御坐東

金印三晉所上其文未詳

皇太后寶制未詳天顯二年應天皇后稱制羣臣上璽  
綬冊承天皇太后儀符寶郎奉寶置皇太后坐右

皇后印文曰皇后教印

皇太子寶未詳其制重熙九年冊皇太子儀中書令授  
皇太子寶

印

吏部印文曰吏部之印銀鑄以印文官制誥

兵部印文曰兵部之印銀鑄以印軍職制誥

契丹樞密院契丹諸行軍部署漢人樞密院中書省漢人諸行宮都部署印並銀鑄文不過六字以上以銀硃為色

南北王以下内外百司印並銅鑄以丹黃為色諸稅務以赤石為色

雙寬印雙寬鷺鳥之總名以為印紐取疾速之義行軍詔賜將帥用之道宗賜耶律仁先鷹紐印即此



符契

自達呼爾氏入部用兵則合契而動僅刻木為牌合太祖受命易以金魚

金魚符七枚黃金鑄長六寸各有字號每魚左右判合之有事以左半先授守將使者執右半大小長短字號合同然後發兵事訖歸于內府

銀牌二百面長尺刻以國字文曰宜速又曰勅走馬牌國有重事皇帝以牌親授使者手劄給驛馬若干驛

馬闕取它馬代法晝夜馳七百里其次五百里所至如天子親臨須更易無敢違者使回皇帝親受之手封牌印郎君收掌

木契正面為陽背面為陰閤門喚仗則用之朝賀之禮宣徽使請陽面木契下殿至于殿門以契授西上閤門使云授契行勘契官聲喏跪受契舉手勘契同俛興鞠躬奏內外勘契同閤門使云准勅勘契行勘勘契官執陰面木契聲喏平身立少退近後引聲云

軍將門仗官齊聲喏勘契官云內出喚仗木契一隻  
准勅付左右金吾仗行勘勘契官云合不合門仗官  
云合凡再勘契官云同不同門仗官云同亦再勘契  
官近前鞠躬奏勘官左金吾引駕仗勾畫都知某官  
某對御勘同平身少退近後右手舉契云其契謹付  
閤門使進入閤門使引聲喏門仗官下聲喏勘契官  
跪以契授閤門使上殿納契宣徽使受契閤門使下  
殿奉勅喚仗

木箭內箭為雄外箭為雌皇帝行幸則用之還宮勘箭  
官執雌箭東上閤門使執雄箭如勘契之儀詳具禮  
儀志

遼史卷五十七

遼史卷五十七考證

聖宗開泰十年馳驛取石晉所上玉璽于中京 按本  
紀開泰至九年而止次年改元太平此云開泰十年  
者蓋是年改元在十一月取玉璽事尚在未改元之  
前耳

遼史卷五十七考證

欽定四庫全書薈要卷六千一百八十三

遼史卷五十八

元中書右丞相總裁托克托等修

志第二十七

儀衛志四

帝王處則重門擊柝出則以師兵為營衛勞人動衆豈  
得已哉天下大患生於大欲不得不遠慮深防耳智英  
勇傑魁臣雄藩於是乎在寓武備於文物之中此儀仗



所由設也金吾黃麾六軍之仗遼受之晉晉受之後唐  
後唐受之梁唐其來也有自耶律儼陳大任舊志有未  
備者兼考之遼朝雜禮云

### 國仗

王通氏言舜歲徧四岳民不告勞營衛省徵求寡耳遼  
太祖匹馬一麾斥地萬里經營四方未嘗寧居所至樂  
從用此道也太宗兼制中國秦皇漢武之儀文日至後  
嗣因之旄頭豹尾馳驅五京之間終歲勒動轍迹相尋

民勞財匱此之故歟遼自達呼爾摩歡受唐鼓燾之賜  
是為國伏其制甚簡太宗伐唐晉以前所用皆是物也  
著于篇首以見艱難創業之主豈必厚衛其身云

十二神燾

十二旗

十二鼓

曲柄華蓋

直柄華蓋

約尼末主遺制迎十二神燾天子旗鼓置太祖帳前諸弟埒克等叛伊德實縱火焚行宮皇后命海古勒救之止得天子旗鼓太宗即位置旗鼓神燾於殿前聖宗以輕車儀衛拜帝山

渤海仗

天顯四年太宗幸遼陽府人皇王備乘輿羽衛以迎乾亨五年聖宗東巡東京留守具儀衛迎車駕此故渤海儀衛也

漢仗

達呼爾沙琿入朝于唐繅古兄弟繼之尚主封王旣觀  
上國開元東封實古扈從覽太平之盛自是朝貢歲至  
于唐遼始祖聶噶立約尼氏世為國相目見耳聞歆企  
帝王之容輝有年矣約尼致鼓纛於太祖帳前曾何足  
以副其雄心霸氣之所睥睨哉厥後交梁聘唐不憚勞  
勩至於太宗立晉以要冊禮入汴而收法物然後累世  
之所願欲者一舉而得之太原擅命力非不敵席卷法

物先致中京蹤棄山河不少顧慮志可知矣於是秦漢以來帝王文物盡入于遼周宋按圖更製乃非故物遼之所重此其大端故特著焉

太宗會同元年晉使馮道備車輅法物上皇太后冊禮劉昫盧重備禮上皇帝尊號

三年上在薊州觀導駕儀衛圖遂備法駕幸燕御元和殿行入閣禮

六年備法駕幸燕迎導御元和殿

大同元年正月朔備法駕至汴上御崇元殿受文武百僚朝賀自是日以為常

二月朔上御崇元殿備禮受朝賀

三月將幸中京鎮陽詔收鹵簿法物委所司押領先往未幾鎮陽入漢鹵簿法物隨世宗歸于上京

四月皇太弟魯呼遣使問軍事上報曰朝廷起居如禮是月太宗絀世宗即位鹵簿法物備而不御

穆宗應歷元年詔朝會依嗣聖皇帝故事用漢禮

景宗乾亨五年二月神樞升輜輶車具鹵簿儀衛

六月聖宗至于上京留守具法駕迎導

聖宗統和元年車駕還上京迎導儀衛如式

三年駕幸上京留守具儀衛奉迎

四年燕京留守具儀衛導駕入京上御元和殿百僚朝  
賀是後儀衛常事史不復書

鹵簿儀仗人數馬匹

步行擎執二千四百一十二人坐馬擎執二百七十五

人坐馬樂人二百七十三人步行教坊人七十一人御  
馬牽攏官五十二人御馬二十六匹官僚馬牽攏官六  
十六人坐馬挂甲人五百九十八人步行挂甲人百六  
十人金甲二人神輿十二人長壽仙一人諸職官等三  
百五人內侍一人引稍押衙二人赤縣令一人府牧一  
人府吏二人少尹一人司錄一人功曹一人太常少卿  
一人太常丞一人太常博士一人司徒一人太僕卿一  
人鴻臚卿一人大理卿一人御史大夫一人侍御史二



人殿中侍御史二人監察御史一人兵部尚書一人兵

部侍郎一人兵部郎中一人兵部員外郎一人符寶郎

一人左右諸衛將軍三十五人左右諸折衝二十一人

左右諸果毅二十八人尚乘奉御二人排仗承直二人

左右夾騎二人都頭六人主帥一十四人

教坊司差

押纛二

人左右金吾四人虞候攸飛一十六人鼓吹令二人漏

刻生二人押當官一人司天監一人令史一人司辰一

人統軍六人千牛備身二人左右親勳二人左右郎將

四人左右拾遺二人左右補闕二人起居舍人一人左右  
諫議大夫二人給事中書舍人二人左右散騎常侍二

人門下侍郎二人中書侍郎二人鳴鞭二人

內侍  
內差

侍中

一人中書令一人監門校尉二人排列官二人武衛隊

正一人隨駕諸司供奉官三十人三班供奉官六十人

通事舍人四人御史中丞二人乘黃丞二人都尉一人

太僕卿一人步行太卜令一人職官乘馬三百四匹進

馬四匹駕車馬二十八匹人之數凡四千二百三十有

九馬之數凡千五百二十得諸本朝太常卿徐世隆家藏遼朝雜禮者如是至於儀注之詳不敢傳會云

遼史卷五十八

遼史卷五十八考證

馳驅五京之間 按地理志遼太宗以皇都為上京升幽州為南京改南京為東京聖宗城中京興宗升雲州為西京蓋以是為五京云

約尼末主遺制迎十二神纛天子旗鼓置太祖帳前  
原文太祖訛太子據下漢伏文云約尼致纛於太祖帳前則子為祖字之誤

伊德實 伊德實原文作寅底石此又作勻德實今畫

一政

遼史卷五十八考證

欽定四庫全書薈要卷六千一百八十四

遼史卷五十九

元中書右丞相總裁托克托等修

志第二十八

食貨志上

契丹舊俗其富以馬其彊以兵縱馬於野弛兵於民有事而戰續騎介夫夕命辰集馬逐水草人仰漣酪挽強射生以給日用糗糧芻茭道在斯矣以是制勝所向無

前及其有國內建宗廟朝廷外置郡縣牧守制度日增  
經費日廣上下相師服御浸盛而食貨之用斯為急矣  
於是五京及長春遼西平州置鹽鐵轉運度支錢帛諸  
司以掌出納其制數差等雖不可悉而大要散見舊史  
若農穀租賦鹽鐵貿易坑冶泉幣羣牧逐類採撫緝而  
為篇以存一代食貨之略皇祖伊德實為大德呼勒府  
額爾奇木喜稼穡善畜牧相地利教民耕仲父蘓呼為  
裕悅飭國人樹桑麻習組織太祖平諸弟之亂弭兵輕

賦專意於農嘗以戶口滋繁輒疎遠分北達寧額為  
二部程以樹藝諸部效之太宗會同初將東獵三剋奏  
減輜重疾趨北山取物以備國用無害農務尋詔有司  
勸農桑教紡績以烏爾古之地水草豐美命諤爾琨錫  
林居之益以哈里水之善地為農田三年以嘉哩河臚  
朐河近地賜南院鄂津圖魯伊遜巴勒北院烏納哈喇  
三錫林人耕種八年駐蹕赤山宴從臣問軍國要務左  
右對曰軍國之務愛民為本民富則兵足兵足則國彊



上深然之是年詔徵諸道兵仍戒敢有傷禾稼者以軍法論應歷間雲州進嘉禾時謂重農所召保寧七年漢有宋兵使來乞糧詔賜粟二十萬斛助之非經費有餘其能若是聖宗乾亨五年詔曰五稼不登開帑藏而代民稅螟蝗為災罷徭役以恤饑貧帝常過藁城見伊實阿爾威部婦人達年等黍過熟未獲遣人助刈太師韓德讓言兵後逋民棄業禾稼棲畝募人獲之以半給獲者政事令室昉亦言山西諸州給軍興民力凋敝田穀

多躡於邊兵請復今年租六年霜旱災民饑詔三司舊以稅錢折粟估價不實其增以利民又徙濟必寨居民三百戶于檀順薊三州擇沃壤給牛種穀十三年詔諸道置義倉歲秋社民隨所獲戶出粟庾倉社司籍其目歲儉發以振民統和十五年詔免南京舊欠義倉粟仍禁諸軍官非時畋牧妨農開泰元年詔曰朕惟百姓徭役煩重則多給工價年穀不登發倉以貸田園蕪廢者則給牛種以助之太平初幸燕燕民以年豐進土產珍

異上禮高年惠鰥寡賜酺連日九年燕地饑戶部副使  
王嘉請造船募習海漕者移遼東粟餉燕議者稱道險  
不便而寢興宗即位遣使閱諸道禾稼是年通括戶口  
詔曰朕於早歲習知稼穡力辦者廣務耕耘罕聞輸納  
家食者全虧種植多至流亡宜通檢括普為均平禁諸  
職官不得擅造酒糜穀有婚祭者有司給文字始聽道  
宗初年西北雨穀三十里春州斗粟六錢時西番多叛  
上欲為守禦計命耶律唐古督耕稼以給西軍唐古率

衆田臚胸河側歲登上熟移屯鎮州凡十四稔積粟數十萬斛每斗不過數錢以馬人望前為南京度支判官公私給裕檢括戶口用法平恕乃遷中京度支使視事半歲積粟十五萬斛擢左散騎常侍遼之農穀至是為盛而東京如咸信蘓復辰海同銀烏遂春等等五十餘城內沿邊諸州各有和糴倉依祖宗法出陳易新許民自願假貸收息二分所在無慮二三十萬石雖累兵興未嘗用乏迨天慶間金兵大入盡為所有會天祚播遷

耶律迪里等逼立梁王雅里命羣牧人戶運鹽灤倉粟  
人戶侵耗議籍其產以償雅里自定其直粟一車一羊  
三車一牛五車一馬八車一駝從者曰今一羊易粟二  
斗尚不可得此直太輕雅里曰民有則我有若今盡償  
衆何以堪事雖無及然使天未絕遼斯言亦足以收人  
心矣夫賦稅之制自太祖任韓延徽始制國用太宗籍  
五京戶丁以定賦稅戶丁之數無所于考景宗乾亨間  
以上京雲威戶貲具實饒善避繇役遺害貧民遂勒各

戶凡子錢到本悉送歸官與民均差統和中耶律昭言  
西北之衆每歲農時一夫偵候一夫治公田二夫給糺  
官之役當時沿邊各置屯田戍兵易田積穀以給軍饗  
故太平七年詔諸屯田在官斛粟不得擅貸在屯者力  
耕公田不輸稅賦此公田制也餘民應募或治閒田或  
治私田則計畝出粟以賦公上下五年募民耕灤河曠  
地十年始租此在官閒田制也又詔山前後未納稅戶  
並於密雲燕樂兩縣占田置業入稅此私田制也各部

大臣從上征伐俘掠人戶自置鄆郭為頭下軍州凡市井之賦各歸頭下惟酒稅赴納上京此分頭下軍州賦為二等也先是遼東新附地不榷酤而鹽麴之禁亦弛馮延休韓紹勲相繼商利欲與燕地平山例加繩約其民病之遂起大延琳之亂連年詔復其租民始安靖南京歲納三司鹽鐵錢折絹大同歲納三司稅錢折粟開遠軍故事民歲輸稅斗粟折五錢耶律穆濟守郡表請折六錢亦皆利民善政也

欽定四庫全書

遼史  
卷之十七



遼史卷五十九

遼史卷五十九考證

以烏爾固水草豐美命諤爾琨錫林居之 按太宗本紀會同二年十月詔北南院三錫林戶居烏爾古部此止載其一

聖宗乾亨五年 按乾亨無五年蓋在統和未改元以前

五京戶丁之數無所於考 按地理志具載戶數而鄉丁之數見於兵衛志但未免俱有遺漏耳

景宗乾亨間 按景宗原本作聖宗乾亨乃景宗年號  
統和未改元以前僅止數月本紀又不載雲威之戶  
詔卷內于乾亨五年之上冠以聖宗猶可云聖宗初  
立未改元以前事至此云乾亨間則實係景宗時事  
續通考載此事稱景宗今据改

遼史卷五十九考證

欽定四庫全書蒼要卷六千一百八十五

遼史卷六十

元中書右丞相總裁托克托等修

志第二十九

食貨志下

征商之法則自太祖置羊城於炭山北起榷務以通諸道市易太宗得燕置南京城北有市百物山待命有司治其征餘四京及它州縣貨產懋遷之地置亦如之東

平郡城中置看樓分南北市禺中交易市北午漏下交易市南雄州高昌渤海亦立互市以通南宋西北諸部高麗之貨故女直以金帛布蜜蠟諸藥材及鐵驪靺鞨伊濟等部以蛤珠青鼠貂鼠膠魚之皮牛羊駝馬毳罽等物來易於遼者道路纏屬聖宗統和初燕京留守司言民艱食請弛居庸關稅以通山西糴易又令有司諭諸行宮布帛短狹不中為度者不粥於市明年詔以南北府市場人少宜率當部車百乘赴集開竒峯路以通

易州貿易二十三年振武軍及保州並置榷場時北院  
大王耶律實魯以俸羊多闕部人貧乏請以羸老之羊  
及皮毛易南中之絹二下為便至天祚之亂賦歛既重  
交易法壞財日匱而民日困矣鹽筴之法則自太祖以  
所得漢民數多即八部中分古漢城別為一部治之城  
在炭山南有鹽池之利即後魏滑鹽縣也八部皆取食  
之及征幽薊還次于和拉漈命取鹽給軍自後漈中鹽  
益多上下足用會同初太宗有太造於晉晉獻十六州

地而瀛莫在焉始得河間煮海之利置榷鹽院於香河縣於是燕雲迤北暫食滄鹽一時產鹽之地如渤海鎮城海陽豐州陽洛城廣濟湖等處五京計司各以其地領之其煎取之制歲出之額不可得而詳矣坑冶則自太祖始併室韋其地產銅鐵金銀其人善作銅鐵器又有哈準部者多鐵哈準國語鐵也部置三冶曰柳濕河曰賽音楚古爾蘇曰手山及平渤海得廣州本渤海鐵利府改曰鐵利州地亦多鐵東平縣本漢襄平縣故地

產鐵卅置採煉者三百戶隨賦供納以諸坑冶多在國  
東故東京置戶部司長春州置錢帛司太祖征幽薊師  
還次山麓得銀鐵卅命置冶聖宗太平間於潢河北陰  
山及遼河之源各得金銀卅興冶採煉自此以訖天祚  
國家皆賴其利鼓鑄之法先代薩勒題為額爾奇木以  
土產多銅始造錢幣太祖因襲而用之遂致富彊以開  
帝業太宗置五冶太師以總四方錢鐵石敬瑭又獻沿  
邊所積錢以備軍實景宗以舊錢不足於用始鑄乾亨



新錢錢用流布聖宗鑒大安山取劉守光所藏錢散諸  
五計司兼鑄太平錢新舊互用由是國家之錢演迤域  
中所以統和出內藏錢賜南京諸軍司開泰中詔諸道  
貧乏百姓有典質男女計傭價日以十文折盡還父母  
每歲春秋以官錢宴饗將士錢不勝多故東京所鑄至  
清寧中始用是時詔禁諸路不得貨銅鐵以防私鑄又  
禁銅鐵賣入回鶻法益嚴矣道宗之世錢有四等曰咸  
雍曰太康曰大安曰壽隆皆因改元易名其肉好銖數

亦無所考第詔楊遵勗徵戶部司逋戶舊錢得四十餘萬緡拜樞密直學士劉伸為戶部使歲入羨餘錢三十萬緡擢南院樞密使其以災沴出錢以振貧乏及諸宮分邊戍人戶是時雖未有貫朽不可較之積亦可謂富矣至其末年經費浩穰鼓鑄仍舊國用不給雖以海雲佛寺千萬之助受而不拒尋禁民錢不得出境天祚之世更鑄乾統天慶二等新錢而上下窮困府庫無餘積始太祖為德埒勒府額爾奇木也懲約尼氏單弱撫諸

部明賞罰不妄征討因民之利而利之羣牧蓄息上下給足及即位伐河東下代北郡縣獲牛羊駝馬十餘萬樞密使耶律色珍討女直復獲馬二十餘萬分牧水草便地數歲所增不勝算當時括富人馬不加多賜大小鶻軍萬餘足不加少蓋畜牧有法然也咸雍五年蕭托輝為馬羣太保上書猶言羣牧名存實亡上下相欺宜括實數以為定籍厥後東丹國歲貢千足女直萬足珠巴克等國萬足準布武都溫特哩袞各二萬足西夏室

韋各三百疋伊勒圖博和哩鄂羅木富珠哩鐵驪等諸  
部三百疋仍禁朔州路羊馬入宋托歡党項馬鬻于夏  
以故羣牧滋繁數至百有餘萬諸司牧官以次進階自  
太祖及興宗垂二百年羣牧之盛如一日天祚初年馬  
猶有數萬羣每羣不下千疋祖宗舊制常選南征馬數  
萬疋牧于雄霸清滄間以備燕雲緩急復選數萬給四  
時遊畋餘則分地以牧法至善也至末年累與金戰番  
漢戰馬損十六七雖增價數倍竟無所買乃冒法買官

馬從軍諸羣牧私賣日多畋獵亦不足用遂為金所敗  
棄衆播遷以訖于亡松漠以北舊馬皆為達實林牙所  
有遼之食貨其可見者如是耳至於鄰國歲幣諸屬國  
歲貢土宜雖累朝軍國經費多所仰給然非本國所出  
况名數已見本紀茲不復載夫冀北宜馬海濱宜鹽無  
以議為遼地半沙磧三時多寒春秋耕穫及其時黍稷  
高下因其地蓋不得與中土同矣然而遼自初年農穀  
充羨振饑恤難用不少靳旁及鄰國沛然有餘果何道

而致其利歟此無他勸課得人規措有法故也世之論  
錢幣者恒患其重滯之難致鼓鑄之弗給也於是楮幣  
權宜之法興焉西北之通舟楫比之東南十纔一二遼  
之方盛貨泉流行國用以殷給戍賞征賜與億萬未聞  
有所謂楮幣也又何道而致其便歟此無他舊儲新鑄  
竝聽民用故也孟子曰周于利者凶年不能殺人力苟  
至一夫猶足以勝時災况為國乎以是知善謀國者有  
道以制天時地利之宜無往而不遂其志食莫大於穀

貨莫大於錢特志二者以表遼初用事之臣亦善裕其國者矣

遼史卷六十

遼史卷六十考證

聖宗統和初燕京留守司請弛居庸關稅 按聖宗紀  
備載于元年九月是年六月已改元統和此事自應  
繫之統和原作乾亨間誤今改

禁諸路不得貨銅鐵 按道宗紀清寧八年禁南京貨  
鐵九年禁鬻銅自係兩事原本訛銅鐵為銅錢今改  
西夏室韋各三百匹 案契丹志夏國歲貢細馬二十  
匹麀馬二百匹駝百匹與此異



遼史卷六十考證

欽定四庫全書薈要卷六千一百八十六

遼史卷六十一

元中書右丞相總裁托克托等修

志第三十

刑法志上

刑也者始於兵而終於禮者也鴻荒之代生民有兵如  
蠶有螫自衛而已蚩尤惟始作亂斯民鴟義姦宄竝作  
刑之用豈能已乎帝堯清問下民乃命三后恤功于民

伯夷降典折民惟刑故曰刑也者始於兵而終於禮者也先王順天地四時以建六卿秋刑官也象時之成物焉秋傳氣於夏變色於春推可知也遼以用武立國禁暴戢姦莫先於刑國初制法有出於五服三就之外者兵之勢方張禮之用未遑也及蘇爾威汗知宗室雅里賢命為額爾奇木以掌刑辟豈非士師之官非賢者不可為乎太祖太宗經理疆土擐甲之士歲無寧居威克厥愛理勢然也子孫相繼其法互有輕重中間能審權

宜終之以禮者惟景聖二宗為優耳然其制刑之凡有四曰死曰流曰徒曰杖死刑有絞斬凌遲之屬又有籍沒之法流刑量罪輕重寘之邊城部族之地遠則投諸境外又遠則罰使絕域徒刑一日終身二日五年三日一年半終身者決五百其次遞減百又有黥刺之法杖刑自五十至三百凡杖五十以上者以沙袋決之又有木劒大棒鐵骨朶之法木劒大棒之數三自十五至三十鐵骨朶之數或五或七有重罪者將決以沙袋先于

雕骨之上及四周擊之拷訊之具有籠細杖及鞭烙法  
籠杖之數二十細杖之數三自三十至於六十鞭烙之  
數凡烙三十者鞭三百烙五十者鞭五百被告諸事應  
伏而不服者以此訊之品官公事誤犯民年七十以上  
十五以下犯罪者聽以贖論贖銅之數杖一百者輸錢  
千亦有八議八縱之法籍沒之法始自太祖為塔瑪轄  
實時奉哈陶津汗之命案裕悅實魯遇害事以其首  
惡家屬沒入斡里及淳欽皇后時析出以為著帳郎君

至世宗詔免之其後內外戚屬及世官之家犯反逆等罪復沒入焉餘人則沒為著帳戶其沒入宮分分賜臣下者亦有之木劔大棒者太宗時制木劔面平背隆大臣犯罪重欲寬宥則擊之沙袋者穆宗時制其制用熟皮合縫之長六寸廣二寸柄一尺許徒刑之數詳于重熙制杖刑以下之數詳于咸雍制其餘非常用而無定式者不可殫紀太祖初年庶事草創犯罪者量輕重決之其後治諸弟逆黨權宜立法親王從逆不磬諸甸人

或投高崖殺之淫亂不軌者五車輶殺之逆父母者視  
此訕詈犯上者以熟鐵錐椿其口殺之從坐者量罪輕  
重杖決杖有二人者重錢五百小者三百又為梟磔生  
瘞射鬼箭砲擲支解之刑歸於重法開民使不為變耳  
歲癸酉下詔曰朕自北征以來四方獄訟積滯頗多今  
休戰息民羣臣其副朕意詳決之無或冤枉乃命北府  
宰相蕭達魯等分道疏決有遼欽恤之意眈見于此神  
冊六年克定諸夷上謂侍臣曰凡國家庶務鉅細各殊

若憲度不明則何以為治羣下亦何由知禁乃詔大臣  
定治契丹及諸夷之法漢人則斷以律令仍置鍾院以  
達民寃至太宗時治渤海人一依漢法餘無改焉會同  
四年皇族舍利郎君謀毒通事嘉里等已中者二人命  
重杖之及其妻流于矩巴哩密河族造藥者世宗天祿  
二年天德蕭翰劉格及其弟瑣都等謀反天德伏誅杖  
翰流劉格遣瑣都使哈噶斯國夫四人之罪均而刑異  
遼之世同罪異論者蓋多穆宗應歷十二年國舅帳郎



君蕭延之奴哈里疆陵伊喇圖哩年未及之女以法無  
文加之宮刑仍付圖哩以為奴因著為令十六年諭有  
司自先朝行幸頓次必高立標識以禁行者比聞綽呼  
輩故低置其標深草中利人誤入因之取財自今有復  
然者以死論然帝嗜酒及獵不恤政事五坊掌獸近侍  
奉膳掌酒人等以獐鹿野豕鶻雉之屬亡失傷斃及私  
歸逃亡在告踰期召不時至或以奏對少不如意或以  
飲食細故或因犯者遷怒無辜輒加炮烙鐵梳之刑甚

者至于無算或以手刃刺之斬繫射燎斷手足爛肩股折腰脛劃口碎齒棄屍于野且命築封于其地死者至百有餘人京師置百尺牢以處繫囚蓋其卽位未久惑女誣錫庫之言取人膽合延年藥故殺人頗衆後悟其詐以鳴鏑叢射騎踐殺之及哈里之死為長夜之飲五坊掌獸人等及左右給事誅戮者相繼不絕雖嘗悔其因怒濫刑諭大臣切諫在廷畏懦鮮能匡拯雖諫又不能聽當其將殺壽格寧古殿前都點檢耶律伊勒哈諫

曰壽格等斃所掌雉畏罪而亡法不應死帝怒斬壽格等支解之命有司盡取鹿人之在繫者凡六十五人斬所犯重者四十四人餘悉痛杖之中有欲寘死者賴王子必舒等諫得免已而怒佛德飼鹿不時致傷而斃遂殺之季年暴虐益甚嘗謂太尉華格曰朕醉中有處決不當者醒當覆奏徒能言之竟無悛意故及於難雖云虐止摯御上不及大臣下不及百姓然刑法之制豈人主快情縱意之具邪景宗在潛已監其失及卽位以宿

衛失職斬殿前都檢點耶律伊勒哈趙王喜隱自囚所  
擅去械鑲求見自辯語之曰枉直未分焉有出獄自辯  
之理命復繫之既而躬錄囚徒盡召而釋之保寧三年  
以穆宗廢鍾院窮民有冤者無所訴故詔復之仍命鑄  
鍾紀詔其上道所以廢置之意吳王舒為奴所告有司  
請鞠帝曰朕知其誣若案問恐餘人效之命斬以徇五  
年近侍薩喇勒誤觸神燾法應死杖而釋之庶幾寬猛  
相濟然緩于討賊應歷逆黨至是始獲而誅焉議者以

此少之聖宗冲者嗣位睿智皇后稱志留心聽斷嘗勸帝宜寬法律帝壯益習國事銳意於治當時更定法令凡十數事多合人心其用刑又能詳慎先是契丹及漢人相毆致死其法輕重不均至是一等科之統和十二年詔契丹人犯十惡亦斷以律舊法死囚屍市三日至是一宿卽聽收瘞二十四年詔主非犯謀反大逆及流死罪者其奴婢無得告首若奴婢犯罪至死聽送有司其主無得擅殺二十九年以舊法宰相節度使世選之

家子孫犯罪徒杖如齊民惟免黥面詔自今但犯罪當  
黥即准法同科開泰八年以竊盜贓滿十貫為首者處  
死其法太重故增至二十五貫其首處死從者決流嘗  
敕諸處刑獄有寃不能申雪者聽詣御史臺陳訴委官  
覆問往時大理寺獄訟凡關覆奏者以翰林學士給事  
中政事舍人詳決至是始至少卿及正主之猶慮其未  
盡而親為錄囚數遣使詣諸道審決寃滯如邢抱朴之  
屬所至人自以為無寃五院部民有自壞鎧甲者其長

佛努杖殺之上怒其用法太峻詔奪官吏以故不敢酷  
達爾罕納旺舒因醉言宮掖事法當死特貫其罪五院  
部民偶遺火延及木葉山兆域亦當死杖而釋之因著  
為法至於達巴噶始竊薊州王令謙家財及覺以刃刺  
令謙幸不死有司擬以盜論止加杖罪又納默庫犯竊  
盜者十有三次皆以情不可恕論棄市因詔自今三犯  
竊盜者黥額徒三年四則黥面徒五年至於五則處死  
若是者重輕適宜足以示訓近侍劉格烏古斯嘗從齊

王妻而逃以赦後會千齡節出首乃詔諸近侍護衛集  
視而腰斬之於是國無倖民綱紀修舉吏多奉職人重  
犯法故統和中南京及易平二州以獄空聞至開泰五  
年諸道皆獄空有刑措之風焉故事樞密使非國家重  
務未嘗親決獄訟惟額爾奇木主之及蕭和卓蕭朴相  
繼為樞密使專尚吏才始自聽訟時人轉相效習以狡  
智相高風俗自此衰矣故太平六年下詔曰朕以國家  
有契丹漢人故以南北二院分治之蓋欲去貪枉除煩



擾也若貴賤異法則怨必生夫小民犯罪必不能動有司以達於朝惟內族外戚多恃恩行賄以圖苟免如是則法廢矣自今貴戚以事被告不以事之大小竝令所在官司案問具申北南院覆問得實以聞其不案輒申及受請託為奏言者以本犯人罪罪之七年詔中外大臣曰制條中有遺闕及輕重失中者其條上之議增改焉

遼史卷六十一

遼史卷六十一考證

刑法志上有遼欽恤之意昉見于此 按太祖紀七年  
六月以實喇縣人繯古非法殘民磔之聞獄官聶呀  
造大校人不堪苦誅之九月遂有疏決滯獄之詔以  
韓知古領其事則遼初欽恤之政固多可紀也

遼史卷六十一考證

欽定四庫全書薈要卷六千一八十七

遼史卷六十二

元中書右丞相總裁托克托等修

志第三十一

刑法志下

興宗即位欽哀皇后始得志昆弟專權馮嘉努等希欽  
哀意誣蕭楚布等謀反連及嫡后仁德皇后楚布等十  
餘人與仁德姻援坐罪者四十餘輩皆被大辟仍籍其

家幽仁德于上京既而遣人弑之迫殞非命中外切憤

欽哀後謀廢立遷於慶州及奉迎以歸頗復預事其酷

虐不得逞矣然興宗好名喜變更又溺浮屠法務行小

惠數降赦宥釋死囚甚衆重熙元年詔職事官公罪聽

贖私罪各從本法子弟及家人受賕不知情者止坐犯

人先是南京三司銷錢作器皿三斤持錢出南京十貫

及盜遺火家物五貫者處死至是銅逾五斤持錢及所

盜物二十貫以上處死二年有司奏元年詔曰犯重罪

徒終身者加以捶楚而又黥面是犯一罪而具三刑宜免黥其職事官及宰相節度使世選之家子孫犯姦罪至徒者未審黥否上諭曰犯罪而悔過自新者亦有可用之人一點其面終身為辱朕甚憫焉後犯終身徒者止刺頸奴婢犯逃若盜其主物主無得擅黥其面刺臂及頸者聽犯竊盜者初刺右臂再刺左三刺頸之右四刺左至於五則處死五年新定條制成詔有司凡朝日執之仍頒行諸道蓋纂修太祖以來法令參以古制其

刑有死流杖及三等之徒而五凡五百四十七條時有羣牧人竊易官印以馬與人者法當死帝曰一馬殺二人不亦甚乎減死論又有兄弟犯強盜當死以弟從兄且俱無子特原其弟至於枉法受賕詐赦走遞偽學御書盜外國貢物者例皆免死郡王塔布家奴默爾吉告其主言涉怨望鞠之無驗當反坐以欽哀皇后裏言竟不加罪亦不斷付其主僅籍沒馬寧遠軍節度使蕭白彊掠烏爾古德喀勒都詳袞達魯女為妻以后言免死

杖而奪其官默爾根達使酒殺人而逃會永壽節出首  
特赦其罪皇妹秦國公主生日帝幸其第伶人張隋本  
宋所遣諜者大臣覺之以聞召詰款伏乃遽釋之後詔  
諸職官私取官物者以正盜論諸帳郎君等於禁地射  
鹿決杖三百不徵償小將軍決二百已下至百姓犯者  
決三百聖宗之風替矣道宗清寧元年詔諸宮都部署  
曰凡有機密事即可面奏餘所訴事以法施行有投訴  
訛之書其受及讀者皆棄市二年命諸郡長吏如諸部



例與僚屬同決罪囚無致死獄中下詔曰先時諸路死刑皆待決於朝故獄留滯自今凡強盜得實者聽即決之四年復詔左伊勒希巴曰比詔外路死刑聽所在官司即決然恐未能悉其情或有枉者自今雖已款伏仍令附近官司覆問無冤然後決之有冤者即具以聞咸雍元年詔獄囚無家者給以糧六年帝以契丹漢人風俗不同國法不可異施於是命特哩袞蘇樞密使伊遜更定條制凡合於律令者具載之其不合者別存之

時校定官即重熙舊制更竊盜賊二十五貫處死一條增至五十貫處死又刪其重複者二條為五百四十五條取律一百七十三條又創增七十一條凡七百八十九條增重編者至千餘條皆分類列以太康間所定復以律及條例參校續增三十六條其後因事續校至大安三年止又增六十七條條約既繁典者不能徧習愚民莫知所避犯法者衆吏得因緣為姦故五年詔曰法者所以示民信而致國治簡易如天地不忒如四時使

民可避而不可犯比命有司纂修刑法然不能明體朕  
意多作條目以罔民於罪朕甚不取自今復用舊法餘  
悉除之然自太康元年北院樞密使耶律伊遜等用事  
宮婢單登等誣告宣懿皇后伊遜以聞即詔伊遜劾狀  
因實其事上怒族伶人趙惟一斬高長命皆籍其家仍  
賜皇后自盡三年伊遜又與其黨謀構昭懷太子陰令  
右護衛太保耶律扎拉告知樞密院事蕭蘇色等八人  
謀立皇太子詔案無狀出蘇色托卜嘉外補流護衛薩

布等六人詔告首謀逆者重加官賞否則悉行誅戮伊  
遜教牌印郎君蕭額都溫自首臣嘗預蘇色等謀因籍  
姓名以告帝信之以伊遜等鞫案至杖皇太子囚之宮  
中別室殺托卜嘉薩喇等三十五人又殺蘇色等諸子  
其幼稚及婦女奴婢家產皆籍沒之或分賜羣臣雅克  
等詐為太子變書以聞上大怒廢太子徙上京伊遜尋  
遣人弑于囚所帝猶不寤朝廷上下無復紀律天祚乾  
統元年凡太康三年預伊遜所害者悉復官爵籍沒者

出之流放者還鄉里至二年始發伊遜等墓剖棺戮尸  
誅其子孫餘黨子孫減死徙邊其家屬奴婢皆分賜被  
害之家如耶律托卜嘉蕭達囉克等黨人之尤兇狡者  
皆以賂免至於覆軍失城者第免官而已行軍將軍耶  
律聶哱三人有禁地射鹿之罪皆棄市其職官諸局人  
有過者鐫降決斷之外悉從軍賞罰無章怨讟日起劇  
盜相挺叛亡接踵天祚大恐益務繩以嚴酷由是投崖  
砲擲釘割鬻殺之刑復興焉或有分尸五京甚者至取

其心以獻祖廟雖由天祚抹患無策流為殘忍亦由祖宗有以啟之也遼之先代用法尚嚴使其子孫皆有君人之量知所自擇猶非祖宗貽謀之道不幸一有昏暴者少引以藉口何所不至然遼之季世與其先代用刑同而興亡異者何歟蓋創業之君施之於法未定之前民猶未敢測也亡國之主施之於法既定之後民復何所賴焉此其所為異也傳曰新國輕典豈獨權事宜而已乎天祚末年遊畋無度頗有倦勤意諸子惟文妃所

生額魯溫最賢蕭奉先乃元妃兄深忌之會文妃之女兄適耶律達哈拉女弟適耶律伊都奉先乃誣告伊都等謀立晉王尊天祚為太上皇遂戕達哈拉及其妻賜文妃自盡額魯溫以不與謀得免及天祚西狩奉聖州又以耶律薩巴等欲劫立額魯溫遂誅薩巴盡其黨與額魯溫以有人望即日賜死當時從行百官諸局承應人及軍士聞者皆流涕蓋自興宗時遽起大獄仁德皇后戕于幽所遼政始衰道宗殺宣懿皇后遷昭懷太子

太子尋被害天祚知其父之寃而已亦幾殆至是又自  
殺其子額魯溫傳曰於所厚者薄無所不薄矣遼二百  
餘年骨肉自相殘滅天祚荒暴尤甚遂至于亡噫



遼史卷六十二

欽定四庫全書蒼要卷六千一百八十八

遼史卷六十三

元中書右丞相總裁托克托等修

表第一

世表

天開於子地闢於丑人生於寅天地人之初一焉耳矣  
天動也有恒度地靜也有恒形人動靜無方居止靡常  
天主流形地主蓄泄二氣無往而弗達亦惟人之所在

而畀付焉庖犧氏降炎帝氏黃帝氏子孫衆多王畿之

封建有限王政之布濩無窮故君四方者多二帝子孫

而自服土中者本同出也考之宇文周之書遼本炎帝

之後而耶律儼稱遼為軒轅後儼志晚出蓋從周書蓋

炎之裔有曰葛烏菟者世雄朔陞後為冒頓汗所襲保

鮮卑山以居號鮮卑氏既而慕容燕破之析其部曰宇

文曰庫莫奚曰契丹契丹之名昉見于此隋唐間契

丹主號呼爾氏武后遣將擊潰其衆達呼爾氏微別

部長果珍代之果珍尋滅德呼勒部長聶呼立達年扎里為蘇爾威汗更號約尼氏唐賜國姓曰李懷秀懷懷秀叛唐更封且羅為王而聶呼之後曰努爾蘇者左右懷秀且羅至于齊蘇幾百年國勢復振至努爾蘇之孫曰安巴堅功業勃興號錫里氏是為遼太祖於是錫里氏與達呼爾約尼號為三耶律自後國日益大起唐季涉五代宋二百餘年名隨代遷字傳旨轉此其言語文字之相通可考而知者也其所不可知者有若奇善汗

呼喇汗蘇汗昭古汗皆遼之先而世次不可考矣撫其  
可知者作遼世表

帝統 契丹先世

漢 冒頓汗以兵襲東胡而滅之餘衆保鮮卑山因  
號鮮卑

魏 青龍中部長叱能稍桀驁為幽州刺史王雄所  
害散徙橫水之南黃龍之北

晉 鮮卑葛烏菟之後曰普回普回之子莫那自陰

山南徙始居遼西九世為慕容晃所滅鮮卑衆散  
為宇文氏或為庫莫奚或為契丹

元魏契丹國在庫莫奚東異族同類東部鮮卑之別支  
也至是始自號契丹為慕容氏所破俱竄松漠之

間道武帝登國間大破之遂與庫莫奚分背經數  
十年稍滋蔓有部落於和龍之北數百里太武帝  
太平真君以來歲致名馬獻文時使美佛赫赫辰  
來獻始班諸國末欣服旺丹部赫特赫部佛佛頁

部裕魯部錫琳部博恰部理部圖魯部各以名馬  
文皮來貢得交市于和龍密雲之間太和三年高  
句麗與蠕蠕謀取地豆于以分之契丹懼美佛赫  
烏雲率其部落車三千乘衆萬餘口內附止於白  
狼水東

北齊 天保四年九月契丹犯塞文宣帝親討之至平州

乃超長塹司徒潘相樂率精騎五千自東道超青  
山安德王韓軌率騎四千東斷走路帝親踰山嶺

奮擊虜男女十餘萬雜畜數十萬相樂又於青山  
大破別部所虜生口分置諸州復為突厥所逼又  
以萬家寄處高麗境內

隋開皇四年率都美佛赫來謁五年悉衆款塞高祖  
納之聽居故地六年諸部相攻不止又與突厥相  
侵高祖使使諭解之別部楚布等違高麗來附置  
於克賓克囊嘉特之北開皇末別部四千餘戶違  
突厥來降高祖給糧遣還固辭不去部落漸衆遂



北徙逐水草當遼西正北二百里依赫辰水而居  
東西亘五百里南北三百里分爲十部兵多者三  
千少者千餘有征伐酋帥相與議之興兵則調合  
符契突厥沙布爾汗遣特屯潘埏統之契丹殺特  
屯大業七年貢方物

唐 契丹地直京師東北五千里而羸東距高麗西奚  
南營州北靺鞨室韋阻冷陁山以自固射獵居處  
無常其君達呼爾氏有勝兵四萬析八部臣于奚

厥以為侯斤調發攻戰則諸部畢會獵則部得自行與奚不平每鬪不利輒遁保鮮卑山武德初大師孫敖曹與靺鞨長都塔濟俱來朝二年入犯平州境六年君長多囉獻名馬豐貂貞觀二年摩歡來降突厥請以梁師都易契丹太宗曰契丹突厥不同類師都唐編戶我將擒之不可易降者三年摩歡入朝賜鼓纛由是有常貢帝伐高麗悉發契丹奚首領從軍還過營州以庫克為左武衛將軍

大師和卓珠奇率衆來歸即部為玄州州以珠奇  
為刺史隸營州都督府庫克舉部內屬乃置松漠  
都督府以庫克為都督封無極男賜姓李以德濟  
部為峭落州赫伯部為彈汗州都呼部為無逢州  
芳阿部為羽陵州圖勒彬部為日連州芮奚部為  
徒河州卓津部為萬丹州富部為匹黎赤山二州  
俱隸松漠府以舒和卓為刺史庫克死與奚叛行  
軍總管阿實達樞賓執松漠都督鄂博庫獻于東

都庫克二孫曰奎瑪里殫汗州刺史歸順郡王曰  
盡忠松漠都督敖曹曾孫曰萬榮歸誠州刺史時  
營州都督趙文翽數侵侮其下盡忠等怨望與萬  
榮共舉兵殺文翽據營州自號為無上汗汗萬榮  
為帥不二旬衆數萬攻崇州執擊討副使許欽寂  
武后怒詔將軍曹仁師等二十八將擊之更號萬  
榮曰萬斬盡忠曰盡滅戰西硤石黃獐谷王師敗  
績進攻平州不克武后益發兵擊契丹萬榮夜襲

檀州清邊道副總管張九節拒戰萬榮敗走俄盡

忠死突厥摩多罷破其部萬榮收散兵復振別將

駱務整何阿小八冀州殺刺史陸寶積掠數千人

武后聞盡忠死詔夏官尚書王孝傑等率兵十七

萬討萬榮戰東硤石敗績孝傑死之萬榮進屠幽

州又詔御史大夫婁師德等率兵二十萬擊之萬

榮乘銳鼓行而南殘瀛州屬縣神兵總管楊立基

率奚兵掩擊大破萬榮執何阿小別將李楷固駱

務整降萬榮委軍走立基與奚四面合擊萬榮衆潰東走張九節設三伏待之萬榮窮蹙與家奴輕騎走路河東憊甚卧林下奴斬其首以獻九節傳東都契丹餘衆不能立遂附突厥開元二年盡忠從父弟舍琿率部落歸唐

舍琿玄宗賜丹書鐵券開元四年與奚長李  
大酺偕來詔復置松漠府以舍琿為都督封  
松漠郡王仍置靜析軍以舍琿為經畧大使

八部長皆為刺史五年以楊氏為永樂公主  
下嫁舍琿六年卒

纒固舍琿之弟帝以纒固襲爵開元七年十  
一纒固固與公主來朝衙官格圖宵勇悍得  
衆心纒固欲除之事泄格圖宵攻之纒固奔  
榮州都督許欽澹及奚君李大酺攻格圖宵  
不勝纒固大酺皆死

裕允纒固從父弟也格圖宵推以為主遣使

謝罪玄宗冊立麗絜固位開元十年裕允入朝以慕容氏為燕郡公主下嫁裕允卒

托允裕允之弟麗官爵開元十三年托允復與格圖胥猜阻與公主來奔封遼陽王

寶古托允之弟國人共立之開元十三年冬朝于行在徙封禪泰山改封廣化郡王以陳氏為東光公主下嫁寶古十八年為格圖胥所弑以其衆降突厥東光公主走平廬



庫哩不知其世系格圖宵立之開元二十二  
年六月幽州節度使張守珪大破格圖宵十  
二月又破之斬庫哩及格圖宵等傳首東郡  
餘衆散走山谷

果珍本契丹部長為松漠府衙官斬格圖宵及庫  
哩歸唐幽州節度使張守珪立之封北平郡王是  
年格圖宵餘黨聶呼弒果珍屠其家一子琳沁走  
安東拜左驍衛將軍自此契丹中哀達呼爾氏附

庸于奚王以通於唐朝貢歲至至德寶應間再至  
大歷十二年貞元九年十年十一年三至元和中  
七至大和開成間四至泥禮耶律儼遼史書為涅  
里陳大任書為雅里蓋遼太祖之始祖也

李懷秀唐賜姓名契丹名達年扎里本八部大師  
天寶四年降唐拜松漠都督安祿山表請討契丹  
懷秀發兵十萬與祿山戰潢水南大敗自是與祿  
山連不解耶律儼紀云太祖四代祖祖怒祖努爾

蘇為德呼勒部額爾奇木遣將珠勒呼科里大敗  
安祿山于潢水適當懷秀之世則懷秀固約尼氏  
之首君為蘇爾威汗明矣

且羅以唐封恭仁王代松漠都督遂稱契丹王其  
後寔大貞元四年犯北邊幽州以聞自祿山反河  
北割據道隔不通世次不可悉考

契丹王齊蘇武宗會昌二年授雲麾將軍幽  
州節度使是為伊蘭汗張仲武奏云契丹書

用回鶻印乞賜聖造詔以奉國契丹為文  
契丹王實勒是為巴拉汗咸通中再遣使來  
貢獻部落寢強

契丹王欽德實勒之族也是為哈陶津汗光  
啟中鈔掠奚室韋諸部落皆後服之數與劉  
仁恭相攻晚年政衰八部大人法常三歲代  
德呼勒部耶律安巴堅建鼓旗自為一部不  
受代自號為王盡有契丹國約尼氏遂亡

蕭罕嘉努言先世約尼汗溫之後國祚中絕自額  
爾奇木聶呼立蘇爾威汗大位始定今以唐史遼  
史參考達呼爾氏絕于寶古聶呼所立則懷秀也  
其間唯庫哩果珍二世庫哩乃格圖肯所立果珍  
以別部長為聶呼所殺唐史稱聶呼為格圖肯餘  
黨則溫汗者始為庫哩耶